

可  
園  
文  
存

司園文存卷十五目錄

賦下

飛宇若雲浮賦

新修金山寺賦

東山賦

半山寺謝公墩賦

大功坊懷古賦

靈谷寺琵琶街側八功德水賦

江南春賦

瞻園賦

聞雞起舞賦

春夜宴桃李園賦

可隱文存

卷十五目錄

海客談瀛洲賦

廣廈庇天下寒士賦

柳母和熊丸助讀賦

西窗話雨賦

杏花春雨在江南賦

勞勞亭送客賦

可園文存卷十五

江甯陳作霖伯雨

賦下

飛宇若雲浮賦

并序

辛未

江甯城東北有廨宇焉爲督府建節之所裴公綠野李相  
平泉制甚麗也癸丑之亂燬於兵火湘鄉侯相戡定金陵  
念物力之艱越七年乃葺而新之棟宇高鸞上薄雲漢侯  
王之宅斯其選已屬承命阮有取於太沖詠史之句復  
刺左司自慙居處崇未瞻斯民康二語以爲韻其謙抑之  
懷憂勤之志胥於是乎見爰假主客之問答而賦之曰

西園主人以清泰之年宣撫綏之治百廢具興四民蒙賜迺  
庀羣材命計吏相舊基修官次門閤洞開室廬幽邃塗墾飾

其高檐旋馬敞其聽事會合仰風雲之盛職思其居輝煌鬱  
棟宇之規敢忘所自則有賓僚宴集佐吏衙參當履綦之濟  
濟瞻府第之潭潭謂夫地除荆棘木萃梗相高宇崇隆俯瞰  
青溪之水晴雲蓊鬱近連鍾阜之嵐卻浮塵之外著望飛閣  
之中含庶幾宅列紫宮有京邑之居可匹若問詠成青史惟  
太沖之什無慙然而洛陽建置典午權輿驕奢相尙謀慮多  
疏王氏作竹林之集石家營金谷之居門楣則賈郭爭榮未  
容深責權勢笑張裴猶戀遑問其餘是雖銅鋪玉砌青瑱丹  
除而騫比翔鶻方入孟堅之賦變同蒼狗合稽太史之書若  
乃域訪建康地臨江渚握節遠來淮官有所旣已經侯景之  
塵燬謝公之墅堂址成墟柱基廢礎瓦碎鴛鴦草藏狐鼠而  
公則手握乾符躬提一旅東南得以奠安天下占其出處庇

杜陵之厦宇澤洽勾吳望衡嶽之烟雲靈鍾荆楚況夫爵列  
通侯之貴班居使相之崇勵精圖治退食自公即使堂廉曠  
遠宮館玲瓏適以增元臣之重誰敢譏自奉之豐而乃書生  
性儉傳舍居同恤萬民之力經七載之終然後鳩工創造燕  
寢周通縱令取義斷章聊配王侯之宅終是去彫崇樸不忘  
儻素之風西園主人乃作而言曰夫興作太繁者度支之勞  
實也息偃求安者人生之暮氣也繁昔運值金行緒承曹魏  
風尚清談人多矜貴競屋宇之崇宏狀烟雲之黼黻而太沖  
猶復氣壓豪彊胸分涇渭振衣而岡獨崇濯足而流自沸鄙  
閭閻陰陽之制高步而歸有欽寄磊落之情蹈道則未今子  
乃舉以爲緣何不知予之辛苦乎當夫巨憝未平將軍好武  
列大漠之營屯練戈船之樓櫓戴月披星餐風宿雨劬勞雖

已備嘗清晏未能逆覩居無定宇難謀片席之安陣壓壞雲  
誓整三軍之伍茲幸名城恢復羣力維持地皆瓦礫人尙瘡  
痍蝸結屋廬疑焦氏隱居之地燕巢林木是佛狸初定之時  
而予乃宴遊有處俯仰皆宜晨興蒞政夜坐談詩居然羊祜  
風流延賓選勝何必晉卿頌禱聚族于斯願以位爲重鎮職  
本親臣體統宜崇夫官廨規模以示我後人雖嘗爲眾惜財  
儉之又儉已覺拓規大起新而日新遠望則非烟非霧近瞻  
則如輪如囷卽此興將眾役未免勞彼小民讀韋蘇州兵衛  
之篇何堪反已若左太沖高門之什敬以謝賓客乃逡巡而  
稱曰偉哉此論旣明且詳念疲癯之待撫知寢食之不忘行  
將迫相猷於周召致

盛世於成康素儲霖雨之才氣蒸泰岱共仰帡幪之覆澤及

遐方若我我之官署建翼翼之堂皇榱桷騰驤固羣倫所共  
睹精神廣大豈管見所能量

新修金山寺賦

懿惟我

皇上之中興也星明北極澤沛南邦秉

廟謨而除鋒鏑增屯戍而建麾幢自城郭以至囷倉廢舉聿  
興眾役由鄂岳以下吳越地形最重長江其閒岳樓披闔滕  
閣憑窗采石酌金樽之酒武昌聞玉笛之腔莫不棟飛碧瓦  
壁列金缸過勝地而有懷古名流清芬如在庀羣材而重建  
賢長官儒雅無雙然猶未及夫花雨界中劫後餘灰淨洗海  
天佳處磯頭急浪常撞也若夫朱方表域浮玉名峯酈道元  
水經作注裴頭陀禪國稱宗當獲金而易號爰立寺以留蹤



門對蝸廬隱士分。厓雲之宅地崇象。教菩提垂滿月之容。由是莊嚴日啟。靈秀常鍾。層構遞增。翬雉梵聲。屢引魚龍。扼險要於淮揚中流。最勝盛人文於唐宋。曠代相逢。水月談禪。共仰山門之玉帶。風濤激響。何殊蠡澤之石鐘。泊乎

景運宏開

巡輿遍歷揮

北闕之舜絃。覽南方之禹績。肅羽林而拱衛

鸞輅初升灑

宸翰以繽紛

龍章載錫。維時瓊玉飾軒綺。羅被壁蓮花。湧上界之臺。苔色麗中唐之壁

御碑螭互亭撐漢而瓦明。高塔鵲盤鈴搖風而珠滴。伊淨域

之非貪喜

天顏之近覲地不愛寶嘉祥備見於

嵩呼艦縱迷江壯志已閒夫楫擊奈何蛾賊連營鴉軍失伍  
奪鐵寶之城控瓜洲之浦挫銳卒於樵峯據名山於氏父吳  
頭楚尾往來原屬要衝紺宇琳宮乾淨幾無寸土卽至鎮復  
南徐兵雄北府肅號令於旌旗極森嚴於樓櫓鯨音叩月束  
一千餘里之波濤馬矢成山是五十三參之廊廡每到盤陀  
石畔登絕頂以望鄉惟聞老鶴河邊援巨桴以鳴鼓旣而  
聖皇命相元老治軍君寶負洛中之望阿童建江上之勳望  
兵氣之全消光爭日月悵香城之半隱地涌曇雲於是圖經  
歷按丈尺區分召匠石而審勢命郢人而揮斤彈指則華嚴  
現界凝眸則海國無氛泉訪中泠莫誤參寥之井石蹲孤嶼

依然郭璞之墳慨當年旗閃蚩尤幾多擾攘喜此日龕安彌  
勒已絕聲聞徒觀夫雕楹畫棟月地雲階牆粉塗蠟壁涎洗  
蝸宰堵坡構櫺再構妙高臺風景彌佳挂月島高重鋪綺砌  
留雲亭迴並峙懸厓舞洞裏之潛蛟鐘魚課誦棲峯頭之健  
鶻竹木安排五色煉女媧之石八開設居士之齋談空說有  
娛目騁懷幾疑驚嶺肇登做宗風於秀忍何與燕然親勒銘  
盛烈於湘淮豈知烟塵盡掃名勝堪探昇平原資潤色閭黎  
亦荷包涵倘非鐵馬金戈奏功吳會安得洞天福地稽首仰  
藍況夫

仁皇駐蹕

純廟停驂題句鐫石藏書置龕風月常新定有神祇之護江  
山無恙敢忘

恩澤之覃卽勝遊之可紀詎內典之徒諳試看小結善緣布  
施不遺夫方外須識大興梵刹盛衰直繫乎江南

東山賦

有秣陵客問於會稽主人曰僕嘗躡建業南郊之屐泛秦淮  
秋水之篷芳草春綠斜陽晚紅見夫一峯隆起數里可通高  
下參差尙認亭臺之迹陰森蔥蒨已空竹樹之叢有父老兮  
來告謂實始於謝公地近牛頭仿故鄉以興築名標馬路與  
舊隱其相同不知於越之靈區何似而太傅乃常戀戀於浙  
東乎主人未及答適臨安賓廁其間爰率爾而進曰餘杭之  
境山徑迴環謝公坐處迴絕塵寰濬谷之臨最險石室之杳  
堪攀北海待清此意與伯夷何遠層巖攬勝新詩幸坡老未  
刪一江密邇考據班班則安石所高臥又何必泥於東境而

不在臨安之山會稽主人啞然而笑曰若客之言洵實事以  
求是而賓之說乃於已之多私也夫謝公以陽夏之望當興  
午之時辭南朝之徵辟向東土以棲遲弋漁山水嘯傲竹絲  
汎海遇風旣近龕山之畔登高修禊亦臨蘭渚之淵從未聞  
武林宅卜大滌居移蓋所寓者娥江鑑水而所友者支遁羲  
之無何幕府備員吳興蒞事踐歷侍官從容省寺新亭談笑  
氣折權臣肥水羽書策推敵騎旣重任之迭膺知初衣之雖  
遂於是近郭出遊沖襟有寄萃集賓僚幽尋勝地音仍擁鼻  
高吟本是書生出則致身小草居然遠志爰得土山之區而  
暫止焉天印近連梅岡並峙樹色蒼蒼溪流瀾瀾問郊外面  
非遙較湖中其酷似賞心雲物懸知風景之無殊養望林泉  
實爲蒼生而特起爾乃平其屨屨巧爲摹擬樓館高低林巖

茂美嘉名之移贈何妨別墅乃於茲經始由是徒倚琴尊流連巾褐識幼度之多才愛羊曇之作達園棋戲賭自載酒肴折屐獨欣偶過門悶然猶朝寄欲辭本懷難奪指歸路以遲遲趁海流之活活山陰乘興聊追尋安道子猷江左扶危且付與封胡羯末使果素願克償閒身能乞駕彼鷁舟攜將塵拂則訪剡水之淪淪陟叢山之奇崛定有白頭老妓能識舊人豈徒玉樹佳兒羣呼英物吾知會稽東山且與賀監之四明相同李泌之衡山髣髴矣獨奈何居新城之埭老許歸休望苕霅之閒情猶鬱怫也耶然則長居京服少隱海隅東山之號一例相呼裙屐優游有二水三山之勝鶯花綺麗異千巖萬壑同符彼此互校出處微殊若臨安之所隸特遊迹之所趨謂爲鼎峙不亦值乎寶乃爽然自失與客同辭而對曰

吾子之論祓飾名區山川有信丹青不渝

半山寺謝公墩賦

并序

按金陵謝公墩有三一在治城安石初入都時與王逸少登臨處也一在土山則作相後築以象會稽東山者是皆太傅之遺迹爲圖經所指名若鍾山麓之墩乃謝車騎第宅所依有康樂坊可證然則荆公之屋適當獻武之居宋人疏於考据遂誤以爲文靖沿謬至今莫爲是正謹設主客之問答以補輿地之辨譌其辭曰

有臨川客問於青溪主人曰僕嘗循潮溝之岸眺蔣阜之岡見有半山寺者林深翠篠門掩紅牆碑碣摩挲聊訪祠於名宦鼓鐘鞀鞳記捨宅於空王其側有山墩焉曠宜瞰遠高欲迎陽嵐氣朝爽泉聲夏涼踞一城之形勝經兩哲之徜徉試

看大好江山建業之圖經可按且與暢談晉宋前賢之名字  
難忘昔謝太傅勳高江左望重朝端元子斂謀於姑孰苻堅  
遠遁於長安出爲蒼生休問猿啼鶴怨官從白下愛茲虎踞  
龍蟠於是放懷登覽寄興游觀捉扇風靜折巾雨寒不受衣  
冠之縛居然盤澗之寬螳垤土封讓此地常留遺澤烏衣巷  
近問何人重到長干維王荆公甫離揆席以判府之尊卜歸  
棲之宅侘傺無聊蕭閒自適回塘直塹鍾山隔七里之程散  
髮斜簪元老學六朝之格恨江東無復名流幸典午猶多舊  
迹感劫運於滄桑懷遨遊於裙屐所居如傳舍同心訂異代  
苔岑自顧縱非才承乏亦當朝柱石況復名稱一例心迹雙  
清地則猶是主已頻更非如召伯種棠共尋古埭絕類相如  
慕蘭肇錫嘉名前江令而後段侯同此替人之作招陳輔而



邀楊驥待爲事外之評此其語鄰游戲志見平生地喜林壑之僻席眞野老之爭從熙豐以溯太元未覺名心之消釋率湖壩而遵山麓徒欣界畫之分明也已主人聞之啞然而笑曰子履地而失其眞猶食古而未能化也考謝傳之在都向名山而稅駕一則西治園亭一則土山臺榭發羲之之遐想興趣何超賸幼度之園棋情懷自暇絕未聞相龍尾坡結螭棲舍揮麈兒隨閉門客謝孫楚之樓向杳何從招太白清狂次宗之館就湮無處容彥倫假借然則茲墩之高聳決非文靖所能通有坊壘爾其姓本同封康樂伯實獻武公小物克勦屐屐各當其任大名不朽旗常自著其功度方隅而適合在城郭之偏東路近定林古寺門留陽夏宗風經營占北阜之高指琅邪於大道考證笑後人之陋誤兒輩於阿翁雖以

舒王之博洽撫勝境而討論猶復曲隨俗說未究本源誇閥  
閱之崇高儘許薛滕競爽比閒田之斷決不知虔芮誰存蓋  
其褊懷難化成局思翻攻擊若分朋黨平章聊發狂言小篆  
夾緯詎讓臨流之宅乞身歸隱欲名獨樂之園卽茲偶爾娛  
情廿八字特標新格遂使常留疑案七百年莫辨斯墩今試  
從子披拂荆榛評量烟樹尋游宦之幽居搜鄉邦之掌故水  
多繞綠迷湖陰壁上之題山近割青轉霹靂溝邊之路應恍  
然於二謝之難淆無事爲荆公而迴護也客乃逡巡而言曰  
以下走之懵愚每拘墟之是懼自領高談敢仍昔誤畫戟朱  
門之第旣尙論以知人三山二水之間且登高而作賦

大功坊懷古賦

夫錦衣園毀六朝之松石留圖焉莫愁堂改一湖之蓮藕收

祖焉是皆胄承參組世閱榮枯感荒涼於西第弔興廢於南  
都乃有勢凌霄紫地集輪朱帝里銘勳藏弓刀於武庫天題  
標字煥綽楔於通衢繁大功之坊號至今日而仍呼昔中山  
王以濠梁之雄傑擁上將之旗旛滁陽闢境采石分屯定方  
山而消反側下溧水而拓屏藩樓奪伏龜嘉蠶臣之仗節城  
高踞虎輔聖主以稱尊此其建初基之業立不拔之根交本  
布衣識英豪於草澤令嚴節鉞異兒戲於棘門雖功始顯乎  
江左也而名已滿夫中原既而平漢南征吞吳東討揚濟水  
之千帆定汴梁之一道峭谷防嚴燕都塵掃路遵狐塞捷已  
獻夫元俘關出雁門威豈挫於王保此其羽檄飛馳山河新  
造功遂搗巢功高橫草國分茅土早錫爵以開藩宅傍觚稜  
願乞身以歸老爾乃退食自公有勞不伐散遣兵屯雍容袍

笏大江東去奠京國之山川小院春歸樂瞻園之風月然而  
明祖酬功之心猶欲高其門閭也眷故舊之凋零感年華之  
倏忽鐫銘辭以誌寵恩榮傳鐵券之頒賜舊內而不居惶恐  
上金門之謁欲表張嘉貞之里珂許常鳴非如謝太傅之碑  
字何容沒於是召良工命司會選材產石之山相地禁城之  
外坊莫並高功惟爾大差與噲等爲伍狗屠異微賤之倫尊  
如霍氏不名麟閣有元勳之繪彷彿碧雞名麗奎章而勢更  
崇隆漫疑白馬肝來晚節而君真忝害所由過其下者續問  
旂常誓尋礪帶仰雷雨之經綸契風雲之際會躋常李沐湯  
而上兩國公社稷常留歷神光熹烈之朝三百載勳名未艾  
也奈何江山草草歲月匆匆烟花南渡燈火西宮馬阮曲工  
唱春水一池之綠史黃計窘矢斜陽半壁之紅致使孝陵伐

樹蔭徑生蓬碧苔塵鎖朱邸人空華表依然有鶴化歸來之  
感銅鋪無恙在馬通全積之中可憐梅與聽琴過侯門而思  
舊事賸有漁洋琢句臨淮流而念元功今者長干迢遞鍾阜  
青蒼塔迷佛剎舟泛吳航望獸鑾之啟宇知燕寢之凝香棨  
戟雙開久換長官之署馨香永奉尙尊與姓之王爲之推尋  
標柱流覽廂坊以禁嚴之地變閭閻之場況聞馬鬣培封見  
聖世恩膏之厚定有虎臣贊

化與元戎先後相望

靈谷寺琵琶街側八功德水賦

客有過靈谷寺遺址者見夫羣山合抱亂石縱橫新竹搖青  
而作態樺松落翠以無聲鐘問景陽響隨風杳碑尋道子屐  
踏雲生有水焉跳珠錯落漱玉鏘鳴經冬不涸瀉地成泓出

驚嶺以紆迴菴與悟真相近創龍祠以報祀額同祈澤之名  
曾文正公以禱雨有驗建龍王祠於水側老衲來告曰此本琵琶街側之泉而八  
功德爲人所羨者也昔有高僧蕭梁之彥雲隱名傳沙門行  
練當卓錫以幽棲苦挈瓶之未便禮懺誠通沸泉源現清甘  
莫匹知從淨土而來汲飲堪供出自龍眉之薦想雨花之亂  
落靈異原同玩月影之涵空性真自見其時寶誌法師同心  
齋戒創開善之新居凌雲霄而翫鬱剪刀偕挂偶安世外之  
禪盂鉢爭持不待地中之掘喜一水之相鄰歷數傳而未訖  
北山之麓坡陀西域之池髮髯潮豈盛於八月色自澄秋齋  
屢啟夫八關頂還灌佛迨至寺基之徙適當洪武之初舍珠  
峯之故利營靈谷之精廬紺宇琳宮豔說釋家之富貴麾幢  
羽葆頻邀天子之車輿有甃石之街相直與琵琶之響宛如

絲絃互答瓠觚中。虛鶯語閒關。花底之音待譜。龍章飛舞。山門之字曾書。而是水亦復遠隨。寺到暗逐。山奔其流。汨汨其勢。渾渾向馬鞍而側出。與龍阜以同論。波迴風影。石界雲根。洞難覓。夫朱湖遐心。空寄溝似。通於霹靂。聒耳常喧。靜處偏譁。五里帶松中之韻。伏餘又見懸流。同濟水之源。功能及物。德合觀空。八音遙應。八垢難蒙。倒蔣山而映綠。過桃塢而流紅。清在山兮未濁。術縮地兮偏工。豈真金撥銀槽。四絃迸和。賸有漩流迴湫。一勺相同。無量之殿。偏高吼蒲牢而不隔香積之廚。非遠接竹簷以相通。旣而運更羊劫。星應牛躔。祇園輟講。佛閣飛烟。殿毀孝陵之瓦。塢空天監之甌。惟茲泉之宛在。出中谷而依然。鱗鬣泳游。合是豢龍之沼。輦飛聞寂。誰開怖鴿之筵。幸祈告兮有靈。欲雨而雨。遂馨香兮永享。後天奉

天是蓋響激石中靜藏山腹靈怪所憑壇場是築易寶地之  
前殿爲大雩之肅穆十日應期之感合構神棲百靈効順之  
情屢形奏牘安得不峴訪栽松谷穿隨鹿懷古蹟以流連仰  
聖朝之禱祝其祀比名川大澤祠官宜領於有司此閒有峻  
嶺崇山浙右休矜夫三竺

江南春賦

并序

夫石頭築塢肇自赤烏禁省稱臺創於司馬因吳太初之  
舊苑立晉建康之新宮歷宋齊以繼都逮梁陳而極盛綺  
羅繁富花月精神帝子風流迭據龍蟠之勝開皇掃盪俄  
驅虎旅而來城邑雖墟山川無恙故仙李踵興之世多騷  
人憑弔之辭若王郎中槩江南春一賦鍾阜秦淮不嫌地  
僻烏衣朱雀祇覺風和其曰今日并爲天下春無江南兮



江北雖有六朝思古之情實極一統頌今之致焉自顧顓  
蒙生居佳麗以高常侍謳吟之歲作李謫仙汗漫之遊免  
走烏飛不無感觸鶯飛蜨影又閱芳菲州隸蔣茅非復元  
和之疆域園開桃李何慚大塊之文章賦曰

懿哉江南之爲地也應斗牛之分野匯淮海之迴瀾險次  
京畿而建省氣殊朔漠而無寒震近東方默驗輿圖於函夏  
良綿北嶺休誇形勢於長安任隆冬凝閉之辰鬱翠僅餘松  
竹問極浦沿澗之所含馨尙有荃蘭何況陽轉天心煖通地  
脈塵蹤輒紅波流灑碧律吹鳳琯欣節候之無偏勝寬鶯花  
覺景光之日闢始獅鬪而終虎渡歷朝幾閱繁華前龍興而  
後馬亡勝國已無餘澤欽惟

聖清之御統實際瀛渤以爲邊渺茲吳地早戴

堯天

帝澤春深動植之沾濡已徧

皇情南顧積逋之租稅頻蠲掃吟花醉月閒情其風肆好是  
省岳巡方舊壤得氣之先想夫

聖祖屢臨再逢陽琯泊

純廟之六巡皆季春之三澣其時雨灑芳郊雲攢飛罕鱗原  
沃潤胥歸

藻韻奎章豹衛森嚴高擁

離宮別館沐

恩波於萬景擊壤而歌通

御氣於夾城不衣亦煖雖以運遭中葉地擾風塵王謝之故  
居草莽褚何之舊宅荆榛窮湖弔月而啼鵲泉幽瀉壑古木

連雲而巢燕巷寂無人玉檻淒涼莫問靈和之柳瓊筵冷落  
誰吟文暢之蘋而當螳柯夢醒虎踞城收重清玉宇永固金  
甌玩河山之如故仰

膏澤之四周元戎則秉鉞分防向故宮而盤馬長吏則勸農  
夙駕過南陌而呼牛生聚廿年久定哀鴻之宅迷茫二水重  
尋白鷺之洲歲序迢迢勞人草草路訪長干令逢太皞瓊花  
照夜銷除靡麗之綠芝蓋飛晨極望往來之道

聖化本無心而布江永可方便君亦有腳邁行春來何早是  
以四方鏡朗萬國砥平惟林陵之片壤尤青帝之先迎振秀  
啟華得涵濡於造物嘔生吹息兼斧藻乎

承明人人火耨水耕爾田田而爾宅宅歲歲清明寒食欲雨  
雨而欲晴晴

瞻園賦應許仙屏方伯教

并序

己丑

金陵有兩瞻園其一在武定橋東爲秦礪泉學士致仕時  
購明相國何如寵故宅以改築取瞻望玉堂如在天上之  
意爲名其一在武定橋西則徐中山王賜第而今方伯之  
使署也癸丑亂後秦宅已蕪無復讌遊之迹而藩廨復建  
園亦漸還舊觀喬木遺徽甘棠新澤由來尙已屬承給札  
爰爲賦之

西江主人望高侍從績著循良居紅薇之畫省開綠野之新  
堂旬宣多暇春日載陽乃召賓友命壺觴林亭游衍泉石徜  
徉感前朝之履迹緬

盛世之冠裳欣茲退食之自公允矣香凝燕寢欲召雄才而  
作記誰歟風送馬當有南國逸客進而言曰明公亦知秦淮

南畔尙有以瞻園傳者乎昔秦修撰厥字礪泉以秣陵之彥  
作瀛島之仙臚聲唱首

講幄隨肩應金芝之瑞氣

學士登第時有瑞芝生因以名軒

領玉筍之班聯

迴思游釣之區隔三千里恭賦

圓明之景得四十篇此特歷溯其承

恩之日也而猶未及夫歸老之年旣而人海倦遊鄉關遂志  
卜旋馬之舊廳得棲鸞之福地小築精廬儘多幽致石疊湖  
嵌竹搖湘翠流連棋酒常招別墅之賓眷戀爐香本是玉皇  
之吏顧三天而意遠東山樓已極岩巖

秦園內有東山樓

夾一水而

名同大功坊漫矜題賜東閣幕僚聞之啞然而笑曰以予所  
稱不過詞臣養望之區何足以爲斯園例乎越在前明眞人  
御世有異姓之名王延殊恩於苗裔賜宅輝煌平泉清麗數

十姓貴游子弟花月琴尊三百年勲戚世家河山帶礪逮  
景運之更新倏行臺之改制畫戟油幢銅鋪玉砌屏藩鎖鑰  
任自重夫南邦臺榭烟雲頌詎同夫西第況當白下之盛時  
共遶翠華於江口

皇澤占春

帝車轉斗旣臨幸夫官齋旋流連於岡阜從臣則劍佩迎花  
衛士則旌旗拂柳星輝雲爛

絲綸藉以發舒

露湛雨深草木於焉承受幸

舜日堯天在望壤祝衢歌介治城鍾阜之閒左宜右有雖或  
紅羊換劫白馬宣威蒼已生於壤瓦草曾沒夫閒扉而大匠  
經營石磴依然鑿鑿重臣莅止鈴轅愈覺巍巍每值簿書事

簡報謁人稀轉螺旋之徑披鶴氅之衣芍藥金園從新玩景  
芝蘭氣馥於此息機亦足見精神之澡雪政事之指揮焉若  
彼故巢小隱初服遂歸經亂而亭臺半毀數傳而子姓式微  
既難免綽楔就湮任榛蕪之不翦又奚能高樓並峙比棣萼  
之爭輝也哉於是西江主人喟然而言曰夫此與彼廢者事  
理之常也居今稽古者考鏡之方也予幸時逢

郅治職寄平章舉明禋於十廟守遺軌於三湘

時修十廟之  
祀及興文正

書亦不過下諧民樂思濟時康豈斯園之修整而敢涉於張  
皇不爲望山何須構榭偶因避雨始欲添廊故視同傳舍之  
居我久力懲其懈弛而辯蹈爭墩之習爾亦宜戒其猖狂也  
二子自瞻園而退眴域兩忘乃深愧燭火之見曾不及日月  
之光

聞雞起舞賦

并序

竊以考古者必論其所值之世而後其人之識量見祖  
士雅與劉越石聞雞起舞人皆謂其遭遇世變志在靖亂  
欲併八王五胡而掃之不知二人同宿在爲司州主簿之  
日越石時年二十六以其卒年四十八當元帝大興元年  
進推之適值惠帝元康七年度士雅之年亦應彷彿其時  
天下承平賈后甫經擅政不獨五胡之亂未萌卽八王之  
亂亦未作而士雅乃激昂慷慨若此索靖銅駝之歎張翰  
尊鱸之思併此而三矣爰本其先見之明繹爲此賦舉凡  
永康太安以後之事皆不敢濫陳懼雜也其辭曰

祖士雅志在有爲識能遠視落拓少年沈淪佐史鸞栖枳棘  
歎薄宦之偶羈鷹盼風飈知雄心之未已何處嚶嚶之響不



失其常警人醉夢之中賴乎有此方其爲司州主簿也京畿  
煩劇末秋卑微向客中而寄宿與越石以相依輒各爭先欲  
同心而懷楫猶未擊聊觀變以澄幾共逆旅之月明交情  
適密感中台之星拆時事將非人盡昏昏我偏躍躍離伏誰  
甘雞聲忽作散四野而荒涼破吾曹之寂寞傳音膈膊偶攪  
上苑鳴蛙作態環珮恐效羊公癡鶴倘他日勳名克建莫忘  
風雨蕭晨縱此時跌宕不羈漫擬京師豪惡壯志縱橫驚人  
此鳴叩須我友奮厲功名旣聞聲而相蹴亦起舞之交并久  
傳出地駕鷺先幾已兆翻訝臨風鵬鴒妙技同呈斫地高歌  
定拔豐城劍鏐仰天待旦猶聽長樂鐘聲蓋其時洛中方盛  
政栖忘勤上下之嬉娛日甚華戎之畛域誰分後宮煽賈郭  
之氛晨剛司牝夾輔笑張裴之懦立孰空羣以致流風侈麗

伏莽紛紜嘯倚東門而意遠酒酣金谷而心醺國無人焉中  
散則龍終見忌亂將作矣華亭則鶴豈常聞蒼茫四顧感慨  
係之宿醒解後曉角吹時省識翰音之相戒頓忘筋力之多  
疲嗤他泄沓羣公巢幕則競爲燕賀自顧昂藏國士依人則  
絕類鷹鷂借茲俯仰以習勞拂衣不止爲語飛揚而得意俟  
我乎而厥後軍建奮武功成谷水秉豫郡之旌麾築雍邱之  
營壘共說梯衝飛舞陷陣摧堅還欣雞犬平安令行禁止而  
越石亦廣武封侯并州筮仕代北連衡晉陽折錘與劉聰相  
拒不容草澤之龍興控上黨爲基力制英雄之蠶起然後知  
才士匡襄名臣建樹柔靡必懲幾微豫觀卽寄跡於下僚已  
不忘夫進取中原努力會清梟鳥之巢從事蒞官暫戢鷗鵬  
之羽逆計鸞生雞距將操同室之戈矛可堪飲到雞鳴尙戀

長宵之歌舞

春夜宴桃李園賦

并序

唐室之盛洛爲東都豪族貴游邸第相望桃李園者殆陪  
京一名區與何以言之李供奉具涵海之才負淩雲之氣  
寄情寥曠胸絕俗塵乃當歡會未終忽有顧影自憐及時  
行樂之感是必在天寶三載翰林被放之初蓋以力士弄  
權祿山蓄釁積薪厝火獨抱杞憂而非若歎老嗟卑之態  
也況其時從兄延年從弟延陵以及南平太守之遙單父  
主簿凝皆麋集梁宋閒贈答詩篇往往而有又與康樂惠  
連之語合類弁之詩曰豈伊異人兄弟具來又曰如彼雨  
雪先集維叢又曰樂酒今夕君子維宴其謫仙此際之情  
乎爰本是意而賦之

塤簾酬唱花月精神亦觴亦咏何主何賓慶一家之雅集蹴  
滿地之香塵恍如藥榜宏開籍登禮部何必酒樓高築橋間  
天津燭照紅妝欣此際不虛良夜賦揮彩筆知當時早惜餘  
春則有李太白者才嫵陰何名高鮑謝派分同姓之恩榮望  
重翰林之聲價金門大隱蟠桃之實休偷玉牒華宗仙李之  
枝相亞屏梨園而製曲貴妃則笛按新聲開藥宴以賞花天  
子則駕乘照夜奈何秩罷遷鶯謾工飛燕東出潼關西辭朵  
殿吹臺尋高適之遊瑣院負知章之薦龍門密邇欣逆旅之  
暫安雁序相聯幸弟兄之重見等是王孫豪貴相將賡棠棣  
之詩迴瞻帝里迢遙無復預櫻桃之宴不觀洛陽之桃李園  
乎籬圍枳棘徑闢蓬蒿緋衣未卸縞袂相遭玩紅白之分明  
地無雜樹縱蒼黃以邂逅樽有香醪岷峨之鄉里難歸一例

飄蓬泛梗齊魯之朋儕未散何妨報李投桃其宴也散列錯  
珍器羅簋簋樂定賞心坐皆從齒行沽店近不勞壓酒吳姬  
笑倚樓高定有折花稚子況復春氣融和夜光邈迤雲淡如  
烟月明於水似遇故人於岸曲流連十里潭花將隨從祖於  
濟南料理一肩行李豈不以華清宮啟強鎮兵屯心傷天寶  
日極中原感歡場之易過若短夢之無痕浮生幾許光陰休  
虛一刻有口莫談時事爲語諸昆桃源之隱可尋誰優游以  
遁跡李下之嫌須避且簡寂以無言卽茲月醉花飛好買千  
金之夜只恐風流雲散俄成獨樂之園遂乃序以言情詩非  
感遇雖多抑鬱之懷絕少激昂之句樂述天倫景饒真趣罰  
遵金谷如探石尉之花階挺瓊枝悉是謝家之樹徒使後來  
之士論世知人聊探前哲之心登高作賦

海客談瀛洲賦 并序

案海上有三神山其一曰瀛洲相傳爲仙人所居故唐初  
開天策府十八學士與其選羨之者以爲登瀛洲然則瀛  
洲者其翰林清祕之庭乎太白天才超逸賀監呼爲謫仙  
天寶中供奉翰林寵遇殊渥暮年流落眷戀逾深其作天  
姥吟借瀛洲以發端而謂爲烟濤難求有慨乎其言之矣  
海客蓋以自況也謹本斯意繹而爲賦其辭曰

李青蓮玉葉分榮金門高步闕北長辭江南小住寄適  
而  
獻歌望詞曹而感慕爰摹仙島之嵯峨以助高談之興趣雄  
辯聊隨焦遂不虞四座之震驚贊辭肇自稽公且考一朝之  
掌故則有瀛洲也者水環溟渤雲擁峯巒員嶠相連而戍削  
蓬萊最近而嶺岼瑤草琪花春多絢爛瓊樓玉宇地極高寒

其間修真之侶掌籍之官佩垂星劍髻聳雲冠騎每驂夫白  
鳳信必待夫青鸞阻帆檣舟楫之通跂予遙望彼翰墨圖書  
之府作如是觀然而身未親歷者其所言必多疏也目未備  
覩者其所語又蹈虛也豈無小儒瑣瑣高士蘧蘧或驅馳於  
塵坳或偃仰於林廬而欲侈陳崑閩爭述祿渠則金粟光明  
莫證前身之果玉堂森蒨難窺福地之書未隨徐市以偕行  
境尙隔夫蟠木縱逞張儀之利口詎亦類於商於若夫海水  
無涯客遊幾載雲夢胸吞烟霞骨在破巨浪以飛行望神山  
之崔嵬景麗扶桑居隣大隗蓮一葉而堪乘藥千金而可采  
半生劍俠掉力士以周旋三疊琴心勞成連之久待鷗鳥之  
往來素狎心純任夫天機蜃樓之變幻何常理可通於宦海  
每當筵散從容茶餘瀟灑憶往事而情殷笑吉人之辭寡偶

逐華陰縣宰睥睨蹇驢非同杜霸少年矜誇裘馬鴟笑事兮  
化鵬龍何妨今作鮓境隔塵凡語工摹寫安期儻遇貽瓜瓌  
而不辭汗漫曾遊記芙蓉之共把半醉而鯨川同吸吾亦酒  
人一竿而鼉首齊迴公真健者無如潯陽飄泊采石盤桓遊  
酣白下殿遠金鑾夢縱依夫兜率力難挽夫迴瀾跌宕名場  
徒數客程歷歷消磨壯志幾經人海漫漫卽茲泛鵲逍遙一  
例著宮袍之錦可奈化龍倏忽九還失寶鼎之丹試迴思鳳  
沼之榮羣仙聚會渾不似蠶叢之險蜀道艱難宮闈參差真  
靈所司縱言及此感慨係之賀監則四明宅築鄴侯則一品  
衣披曲聽霓裳溯平生之奇遇路尋雲嶠豈俗士所能知宜  
其望洋浩歎問道嗟咨悵烟濤之浩渺愁潮汐之稽遲卽追  
盛事於開元誰記集賢改號況說儒臣於貞觀尤欽至聖無



爲也方今

聖天子稽古右文崇賢重士瑣闥清嚴木天茂美懸珊網而搜羅開瑤函而校理士也學富典墳里辭桑梓論道者宛舌同聲儼直者戟冠躡履躬值

德威遠播銷鋒喜海宇之清且將詞賦競傳設問以客卿自擬天姥之吟休咏山勢連天瓊華之島非遙春陰似水

廣廈庇天下寒士賦

并序

杜少陵茅屋爲秋風所破歌有云安得廣廈千萬間大庇天下寒士俱歡顏人每以少陵稷契自許故其願甚大不知此二語者蓋以諷嚴武也史稱武恣行猛政梓州刺史章彝初爲武判官小不副意赴成都杖殺之其待士不以禮可知又謂武窮極奢靡賞賜無度或由一言賞至百萬

則廣廈千萬閒力非不能爲者空山一叟貌是流離顧同  
病之堪憐望故人之厚恤其結句云何時眼前突兀見此  
屋固深翼有是時也夫豈空爲大言乎哉爰本此意而爲  
賦曰

昔有唐肅代之閒嚴鄭公以御史中丞而鎮劍外藻繪山川  
弦歌都會趨勢者紆組影纓拜塵者裁冠博帶時則有去國  
拾遺寄居江瀨偶當疾風暴雨之交絕少片瓦一椽之賴猶  
復軫念孤貧代謀苦蓋感同類飄零何限襟期結異國之懽  
問生平願望誰償眼孔笑書生之大豈不以寒士者困比鷗  
鷺居憐蟲寄願白紵之蕭條下青衫之涕淚江湖奔走幾許  
牢愁家室漂搖何堪負累況當天寶以還四方多事望烽火  
之燭霄安琴書而無地山東則杼柚千家河北則烟塵萬騎

閒行萬里深知旅況之艱何處一隅獨荷天心之庇成都形  
勝棧道千盤爲兵戈所未及與磐石以同安此時上相秉旄  
蔚爲重鎮當日明皇走馬曾駐鳴鑾遂乃豁開險隘羣集衣  
冠是士流之所萃覺天下之非寬風雲鬱鬱人海漫漫劇憐  
冷炙殘羹難耐終朝窮餓豈僅柴門草閣未消五月餘寒夫  
使簡鉞是邦者開閣設筵迎門倒屣接之以清談招之以撫  
恤播儒風於鄒魯居然通德之鄉寄宦籍於崔盧合號鳴珂  
之里不有廣廈千萬閒乎蜂聚房多烏瞻屋止不待買鄰自  
能成市飛輦之宇連雲羅龍之車似水志同道合誰非推宅  
之交露宿風餐絕異荷戈之士由是深情契合比戶安排恭  
承大惠足庇吾儕朱山人居原連屋韋贊善別不臨厓送客  
逢春裴迪則愁懷頓減賈文爲活斛斯則撰述彌佳莫不置

身樂國絕意天涯盤飧樽酒布襪青鞵從異地得新相知於  
心莫逆仰使君如慈父母降福孔皆獨奈何雍容開府慷慨  
登壇座無揖客門列粗官房琯舊恩尙責以屬州之禮謫仙  
新咏竟任歌蜀道之難雖以杜陵相倚執友同看亦僅備員  
於幕下築屋於江干花潭寄做錦水垂竿鶯鶯之隊喜頻來  
雖曰比鄰無惱鵝鷺之班皆例授豈眞賓主交歡今日者商  
飆作勢積潦成灣難禁屋破並苦兒頑方自嗟夫羈旅忽縱  
念夫時艱叙同曹之咨怨望當事之迴環臺榭經營縱可落  
成不日威權指顧有誰號令如山空吟成一幅長歌心殷幻  
想權留作千秋佳話士洗愁顏

柳母和熊丸助讀賦

并序

蓋聞斷機訓學孟氏業成畫荻傳書歐陽名立類皆以松

筠之操永堂構之傳八座起居他日縱能荷寵三冬辛苦此時倍覺傷心者也若夫仲郢登科適在元和十三載而公綽捐館已歷太和之六年橋梓爭榮椿萱並茂旣仰秉義方之久似無勞慈訓之專矣然而華原著望郎署起家嚴君方玉路馳驅敷歷中外令子苟童年驕縱敗箕裘則房喬之男負茲鐵券韓愈之子不識金根豈不墜棗戟之家聲爲膏粱之炯鑒哉爰乃鐫燈夜課停杵宵興當陸績之妙齡垂敬姜之法誠心以勞而不倦大啟塞茅口雖苦而何妨燕茲良藥況夫熊爲蟄獸膽亦珍材藉女手以親調豈貧家之所有湯似飲夫益智能助精神粥如啜夫防風堪充賜胃保門戶者其慮最遠教紈綺者其勢更難固非清之築臺蔭之恤緯所可同日而語矣爰本其意以

爲賦曰

淑女知醫達人有後近案埋頭調羹出手圓莫誤以彈鳥獵  
曾資夫走狗佳兒請業快徵入夢之蘭夫子登程憶折臨歧  
之柳方公綽之歷擁碧幢正仲郢之未離黃口雖疑疑以不  
翠誰循循而善誘未得嚴師兼防昵友志最易於荒惰誦書  
肯趁月光食倘尙夫珍奇餐飯定抄雲母惟韓夫人賢名素  
播紗幔高懸篝燈督課常令蠶簡之紛披不許象牀之偃臥  
足三冬之文史日斯邁亦月斯征撫五尺之形骸白受采而  
甘受和當夫鼂更已轉蟾魄方中色莊對聖頭側垂童偶值  
神思之倦難加鞭策之功憐氣餒而不揚聲如吟蚓恐瑞徵  
之弗應吉負占熊爰乃方書檢點藥性詳端覺有熊兮最猛  
知得膽兮尤難精能益氣溫可祛寒潔亦辟塵點水則一條

成綫久宜爲腊歷時則雙曜跳丸讀者倘劬知之宜豫調不  
須梅攪毋須筯似赤白之探來豈蒼黃而捨去夜能繼夫日  
力顯大神通母竟勝於父嚴是賢內助水漉數升珠傾一斛  
食縱攢眉飽還果腹事幾近於茹荼謀實貽夫式穀念爾父  
宣勞熊軾處貴不驕願吾兒善體母心雖勞猶讀厥後科第  
榮膺朝廷寵遇尹京兆兮綏猷守河南兮理務象笏親傳板  
輿迎駐不忘微賤藥籠之物猶存欲報劬勞翟萐之詩可賦  
西窗話雨賦 并序

李商隱夜雨寄北詩云何當共翦西窗燭卻話巴山夜雨  
時馮注以爲寄內之作案義山以開成二年登進士第會  
昌二年赴河陽王茂元幕就婚俄而茂元卒遊京師久不  
調大中初以員外郎隨鄭亞廉察桂林府罷還東都又出

有江漢巴蜀之行詩蓋此時所作也夫玉溪坎壈實緣姻  
姬長途留滯其有息影之思與爰考其時代探其情悰刺  
取本詩作爲茲賦

河陽雲樹巫峽風波思緘璫札恨寄絲蘿想楊柳於樓頭翠  
眉無恙感芙蓉於江上紅淚應多料理閒身歸鄉國而小隱  
評量離思問溝水其如何昔李義山返從桂嶺遊向洛陽過  
河中而家寄歷劍外而途長時則雲陰稠疊景物淒涼李定  
言曲水探春記曾閒話王秀才京師聽雨同此輕裝波漲巴  
江挂布帆兮安穩閣連棧道聽鈴語兮郎當夫其薄宦意慵  
思鄉情重遭三日之積霖賸半囊之清俸負錦尋詩之役儘  
有童奴分曹射覆之歡苦無賓從逐飄蓬於異地心傷形影  
之單憶卻扇於少年禮盛蚤牢之共有人焉窗底低徊窗前



睇眄迎西陸而涼生對西山而雲卷悵膏沐之不施悔壺觴  
之遠餞斜飛蝠出檐箏鳴碎玉之聲驚夢雞啼爐火留殘香  
之篆遠道難尋夫赤甲望將芳訊遲遲峭寒徐度夫碧紗奈  
此輕風翦翦倘或錦江遡返綺閣歸棲話客懷之況瘁話旅  
思之淒迷挹樓外之輕陰小窗幔啟緇途中之舊作滯雨詩  
題時時聞長歎之聲料有梁間紫燕字字識相思之味曾通  
心上靈犀莫教蛾撲銀釭冷雲母屏風之影猛念虹收青嶂  
在天彭井絡之西銅壺漏永鏡檻人雙花光隱隱燈影幢幢  
此時虛幌同披月迎碧海當日孤城小泊水長空江歷歷前  
塵待證傳書旅雁喁喁私語不驚守戶仙尤從茲別笑牽牛  
望迢遙之銀漢無復夢迴胡蝶聽點滴於篷窗是蓋累坐姻  
連黨分朝局宦已難成心原易足欲求琴劍之安苦畏簡書

之促青春傷別杜司勳本自多情白首工吟卓文君未能免俗儘有長安之憶珠箔飄燈漫誇漢上之遊華筵燒燭

杏花春雨在江南賦并序

虞伯生籍隸臨川而懷歸詩詞屢曰江南者蓋豫章諸郡自唐開元初屬江南西道宋爲江南西路後人因省讀曰江西元遂置江西行省其實江西亦江南也吳楚分疆衡廬接壤道園所咏實在於斯爰本其意而賦之曰

仁壽郡公宦情久冷豫計歸期適當韶景清明寒食天開罨畫之圖水郭山村風颺酒旗之影恍築三山於何異小隱編茅試尋一脈於吳澄文壇開杏方其臘日偶題也闌珊歲事寂寞京華恩深賜藥詔罷宣麻當詞臣之散直正旅客之思家望去迢迢軟綠漲春初之水歸宜緩緩輕紅遲陌上之花

倘其囊攜琴劍路數關津辭三朝之寵秩作萬里之歸人策  
細馬以輕馱獨尋旅店賸短衫而欲換待洗緇塵料阿弟兮  
重逢深夜聽陶菴之雨憶百僚兮出餞輕裝辭燕邸之春一  
路繁華數旬辛苦江國途長杏花豔吐濃雲羈縻作幾日之  
輕寒夾岸繽紛送一枝之柔艣問草堂兮無恙應約顧瑛豈  
句曲兮修真或逢張雨雨細如塵春濃似海鄉井乍逢鬢絲  
已改指青山於天外一髮分明非黃葉之林中數聲欸乃匡  
廬峯居然入夢漫云此願難酬柯敬仲同此傷離爲訊故人  
好在獨是道園以奎章之學士供鉅職於京邦咏吟自適才  
調無雙亦何爲愁生畫省情寄吳艘懶填小宋之新詞競呼  
紅杏頗慕拾遺之晚歲歸臥滄江蓋以禁廷陪列制誥久參  
感年華之漸暮慚勢位之猶貪也同張翰傷時莼菜憶故園

之味何異汪倫送別桃花玩流水之潭校量帽影鞭絲境臨  
夢水珍重玉璫緘札詩檢樊南迄今過華蓋之山訪柘岡之  
路汝水依然墨池如故春黯黯其常陰雨濛濛而似霧江鄉  
得句抗懷文靖之才否宴題名待獻瓊林之賦

勞勞亭送客賦

并序

案金陵勞勞亭直淮水之西南爲吳時所建置初則樓名  
望遠繼則觀改臨滄當孔道之交爲送行之所至唐時而  
尙在經仙李之留題蔓草道旁懷古情而不盡柳花店側  
牽別意以俱長所以寰宇之篇方輿之志莫不標茲名勝  
載入圖經昔瞰大江與征虜中興以俱古試尋遺址距莫  
愁迎擔而非遙爰本杜少陵高詠之情製爲江文通銷魂  
之賦其辭曰

可園文存

卷十五

五

長干大道萬里遊人金尊渌酒寶馬雕輪憶幽情於思古誦  
別賦而傷神驪唱方新風送數聲之笛鳳臺最近地留六代  
之春壑轉林通高亭在空樹深鎖翠欄曲圍紅望望而江山  
若接勞勞而名字誰同赤烏之年載蒼茫絮留苔褐白鷺之  
江洲隱約煖送蘋風夫其津達往來山臨鬱岷候館遙連旌  
符屢拂花吳苑今將離風石尤今誰乞任虎踞龍蟠之地行  
矣難留問鷺飛草長之天懷歸豈不爾乃枉渚維舟離筵出  
餞送客情殷臨崖路轉知竹格之潮通恐桃潭之水淺迢迢  
遠道慣從鷺嶼經行草草別懷憑仗鷺花排遣蓋自黃武之  
元歷永嘉而後名士停橈芳郊置酒書投殷羨之函簞贈袁  
宏之手激昂搥壁幾逢淮水開航憔悴琴條絕類金城撫柳  
新愁西浦舊夢南朝通津地占懸榜名標江泊桃根之楫春

過阜莢之橋卽茲吳楚山川供人登覽不料齊梁冠蓋如許  
蕭條爰有供奉來訪斯亭入金陵之郭揚采石之舫新詩屢  
咏古迹頻經橫江之瓦閣與鄰浪高吹白落日之晴峯遙指  
烟隔猶青

可園文存卷十六目錄

箴

樞臣諍臣臺臣武臣四箴

學箴

銘

凝暉室視銘

冶麓山房視銘

杖銘

菊花石硯銘

贊

陳氏八賢贊

鄭康成從祀贊

可園文存

卷十六目錄

張炳垣典籍贊

席烈士像贊

照像自贊二

內子像贊

掃葉僧像贊

甲寅舉義諸君子圖贊

六十七歲畫像自贊

樊姬楚雲遺容贊

祝文

白文公生日祝文

方忠文公祠祝文

卓忠毅公祠祝文



顧亭林先生祠祝文

秦文愬公入祀鄉賢祠祝文

甘棠文塾享堂祝文

祀蠶神祝文二

祭詩祝文

告文

愍忠祠告文

張靖達公祠安位告文

祭文

公祭沈文肅公文

公祭左文襄公文

公祭曾忠襄公文

祭張又堂軍門文

祭朱子期文

祭二妹文

祭三妹文

祭龔蔗軒文

可園文存卷十六

江甯陳作霖伯雨

箴

樞臣箴

國之元臣實爲柱石參贊廟謨百揆是宅勿曰任專君資籌策勿曰位高民思德澤漢用王尊匈奴面革宋相司馬遼人斂迹威望隆隆外服蠻貊柱史司言敢告執戟

諍臣箴

君有耳目補闕拾遺平心察理度勢揣時主德所繫宜進其規大體所在宜愼厥辭無爭細故無訐陰私無涉朋黨無近把持明季水火覆轍鑒之鯁生不佞敢告所司

璽臣箴

可園文存

卷十六

一

古之諸侯今之節使任轄屏藩權兼將帥雖戒張皇何可弛  
備雖戒因循何可恣意功不濫求罪不豫避寵辱兩忘險夷  
一致鎖鑰巖壘無慚重寄下走顓蒙敢告部吏

武臣箴

邊陲多事名將效忠昔人所重躍馬彎弓今則異是礮火騰  
紅聲喧辟歷威烈祝融屢撼不動其技立窮岳家軍法重與  
山同惟不惜死乃克成功鈴轅上謁敢告司戎

學箴

一事不知儒者之恥欲求放心務學而已勿徒嗜夫古書經  
史所紀必悉今世之所宜而孔孟乃爲不死勿徒泥夫城市  
舟車所駛必會五洲之所通而天地乃非虛揣既博且專我  
聞如是不佞揮毫敢告侍史

銘

凝暉室硯銘

有扁斯石倬彼甫田子孫保之屢豐年

冶麓山房硯銘

矜爾才累爾德石不能言守其黑

杖銘

危則持顛則扶我生託子以爲命戒之戒之行險徼幸

菊花石硯銘

菱兒白湖歸省值予七十晉一之辰獻石硯爲壽特撰是詞

菊花石出瀏陽琢爲硯發古香飲酈水餐屈糧陶詩淡韓節  
剛石不泐花長芳保頑固永壽康

贊

陳氏八賢像贊

并序

句容尙仰止兆山工畫臧有長洲顧氏所繪古聖賢圖冊

內氏陳者凡八人乃撫之以見贈霖瞻仰前徽敬爲作贊

陳文忠公諱堯叟字唐夫閬州人宋端拱中進士第一累官同平章事後以右僕射知河陽卒予諡

秦公之胄厥有唐夫嶺南變俗端右陳謨請盟著錄領郡分

符致君澤民其謂是與

陳文惠公諱堯佐字希元文忠公弟也宋端拱二年進士累官同中書門下平章事以太子太師致仕自號知餘子

諡

文惠立身寬厚儉約好學深思居官樹略臺閣迴翔河隄興作古隸新詩閒情有託

陳后山先生諱師道字無已彭城人宋元祐中以薦授徐州教授紹聖初官祕書省正字

祕書高節刻苦自持安貧樂道說禮敦詩要人恥謁南豐是師假衣不服彼哉挺之

陳文毅公諱亮字同甫永康人宋紹興淳熙間屢上書言事不果用光宗初擢進士第一除簽書建康卒後得諡

同甫為文不拘繩尺慷慨談兵歛獻上策屢忤豪強幾遭橫

逆一命甫鴈還歸真宅

陳恭襄公諱瑄字彥純合肥人明初以父任得官歷至右軍都督僉事充總兵官總督漕運封平江伯卒贈太保進侯子

平江勤幹澤被民生天津衛建青浦山成潞河立閘兌運輸

京利延百世不隕厥名

陳文定公諱敬宗字光世慈谿人明永樂二年進士官至南京國子監祭酒與李時勉齊名卒贈禮部侍郎子諡

祭酒忠誠成均教胄局領修書疏防誑奏返幣中官辭榮司

寇北李南陳羣儒領袖

陳恭愍公諱選字士賢臨海人天順四年會試第一官至廣東布政為市舶中官韋眷所誣被逮憤卒宏治中復官諡恭愍正德中贈

光祿卿子諡

布政涖官棧校風力齊名韓雍長揖汪直獄空重囚體崇中

國讒日鑠金冤沈天黑

陳忠裕公諱子龍字臥子一字大樽華亭人明崇禎十年進士福王時官兵科給事中後受魯王部院職銜結太湖義兵事洩死之國朝乾隆中賜諡

臥子異才松江之彥幾社會文東陽弭變策上福藩恩沾魯殿小腆雖愚孤忠自見

鄭康成從祀贊

漢承秦後經術修明大成之集司農是程門旌北海學冠東京其存其沒爲靈爲英厄難免已拜或從庚祀于齊社奠于孔楹大昕擊鼓吉日吹笙馨香俎豆稽古之榮

張炳垣典籍像贊

淮水清激鍾山秀附誕生異人潛暉未耀聲積潢池禍延學



校徒死非忠棄親非孝勢值傾危力圖號召蓄機甚深上書  
得報匪謀不臧實天不弔孽冠見囚東海難踰義無累人智  
猶除盜烈士之心書生之貌

席烈士像贊

并序

君姓席氏諱存仁上元人咸豐三年粵賊陷金陵以合室  
殉其子元炳甫數齡鄰人出諸火得不死今成室矣哀終  
天之罔極乃繪像以寄慟從甥陳作霖謹作贊曰

猗嗟席君勤儉持躬有家捐累無位效忠生踐王土死爲鬼  
雄懦頑興起百世間風

照像自贊

有倫常歡無富貴福行年六九庸庸碌碌志息化鵬情深舐  
犢侍立者誰仲子詒祿

其二

幻影中影分身外身萃四面鏡成一家春

內子像贊

三十餘年琴瑟友詒德侍旁詒壽在後雖非鳩盤茶亦爲九子母此天水君五十二歲之小影伯雨贊之歲則庚寅月則己卯而日則辛丑也

掃葉僧像贊

龔賢字半千江甯人明亡不仕築半畝園於清涼山麓建樓其中掃葉僧其自號也

謂爲老衲之流耶而其髮髯髻謂爲俗子之輩耶而其骨峻嶒旣遁迹於世外而高不字之貞則天下之塵氛安能盡滌亦姑借擁簪以爲名試登樓而一望百端交集豈徒傷草木搖落無復松柏之長青然非抱宋玉悲懷負元龍豪氣者又誰知清涼山麓有隱居掃葉之高僧

甲寅舉義諸君子圖贊

并序 代

甲寅舉義諸君子者性秉忠貞居同里閭當黃巾之蔽地  
欲赤手以擎天奮螳臂竟可當車入虎穴幾將得子閉門  
十日大索而張良已亡藏血三年含冤而萇宏不死謹撰  
圖贊以當詠詞

張君繼庚善謀多算痛哭請師刻期靖亂委蛇賊中宜獄宜  
岸萬死不承錚錚鐵漢吳君長松晦跡機匠鄰里婦嬰咸資  
保障結約翻城事難得當微服度關不待雞唱胡君思變聯  
合兩軍危城出入雨夜星晨未陷秦謀屢犯楚氛謀實不用  
勿謂無人餘子英英亦皆人傑或死或奔無慙大節五十餘  
年電光一瞥石城雖頽英靈不滅

六十七歲畫像自贊

非仕非隱亦墨亦儒或謂爲識時之彥或疑爲守舊之徒以  
我觀我惟吾知吾是翁蓋目營八表心游太虛以無用爲用  
而豈兩黨之所能拘漢有徐孺子隋有王仲淹其引爲同志  
也夫

樊姬楚雲遺容贊

一場幻夢七載短緣攜金鑾女歸忉利天

茶女旋場

祝文

白文公生日祝文

惟公教宗廣大情恣醉吟禁中來才子之呼洛下寄閒官之  
迹青山獨往顧朝局以傷心碧海終歸證仙緣而得所茲建  
聯吟之社適當攬揆之辰飴進膠牙酒斟婪尾一編長慶詩  
名不亞乎微之九老香山上壽直超夫如滿載瞻圖繪式薦

馨香

方忠文公祠祝文

惟公品成莊士任重儒臣北闕椎心南山埋骨集傳遜志稱  
正學而無慚祠建表忠朝孝陵而遙拱茲當春仲敬薦溪毛  
氣仰浩然留今古君臣之大節神其來格合族姻師友以同  
歆

雨花岡新建卓忠毅公祠祝文

惟公毓秀浙東致身端右厝火之憂獨切徙薪之計不行門  
啟金川恥效從龍之彥氣歸蒼昊證成騎虎之緣自

聖朝有通謚之恩故江左崇表忠之祀梅岡在望松楸聿新  
仰瞻木末軒高同茲封墓式閔之敬一任滄桑世隔猶聞頑  
廉懦立之風

顧亭林先生祠祝文

蓋聞文翁石室揚先哲之清芬陶令柴桑抗逸民之介節惟先生江東絕學勝國孤忠步武三仁儀型百世挺松筠之操極禾黍之悲滄海橫流精衛之填何及蜀天萬里杜鵑之拜徒勞過京邑而眷懷下六謁思陵之淚辭徵書而辟地高不事異姓之心至於抗志聖賢垂情典籍宗橫渠藍田之教以禮爲先闢上蔡象山之歧與禪相近九州俗別成郡國利病之書八類音分正唐宋沿譌之韻網羅今古考證山川通經濟性理爲一家判器識藝文爲二致固不獨守先待後日知錄集其大成餘澤流風蔣山傭署其別號已也茲者山河無恙正朔久更國史冠以儒林慈仁肇其禋祀謹練吉日敬薦瓣香嗚呼祠築治城采蘋之衷如見堂瞻山史化蟬之願常

存斯文在茲後進所仰

秦文愨公入祀鄉賢祠祝文

惟公德隆

帝傳品重儒林秉心則忠實無欺在位則昌言不諱

講帷啟沃羣欽汲黯之直聲

綸誥褒嘉常憶曲江之風度茲者閱時已久念典難忘瞽宗  
循請祀之文

恩命荷

寵頒之制噫嘻先正之遺型具在神降蔣茅泮宮之傑構長  
新薦先芹藻羣賢同室後學所師

甘棠文塾享堂祝文

蓋聞傳登循吏文翁創石室之規教衍司成周禮重瞽宗之  
可闕文存

祭淵甘公之建塾遊童子以會文慈幼情深萃孤兒於一社  
養蒙功正就外傳者十年諸先生誼竺梓桑材儲薪樵或律  
嚴日課定辰入酉出之條或牘校月要循乙降甲升之例精  
神所寄譬欬如存茲當棟宇聿新苾芬肇祀知風微之未沫  
仰靈爽之式臨嗚呼鹿洞法程既永作後來之式馬帷弦誦  
毋敢忘先正之型惠我青衿侑君碧醕

祀蠶神祝文 二則

惟神德毓房精功參富媪首出庶物衣被衆生類取坤元允  
矣天下之母柔遵師教肇於軒后之妃茲值上春敬諏吉日  
馨香蠲潔酒醴紛陳蜀宮之秩祀聿修齊野之調言奚取禱  
通馬祖歌周宣既伯之詩見仰龍星繼魯史大雩之祭

天地亨毒萬彙生兮民時敬授蠶以成兮秉氣之異應星精



今天駟昭朗如月明兮衣被天下眾母名兮有功則祀時靡  
爭兮戴勝既降鳴倉庚兮嘉盛豐潔旨酒清兮有功則祀鑒  
愚誠兮一歲八熟豐且贏兮西陵作配福我氓兮

祭詩祝文

歲將畢月既殘酒滿尊肉在盤主人陳詩一卷再拜而告之  
曰凡人之生精氣爲神興有所寄衍而爲文揮斥日月變化  
風雲眾體之託詩爲最尊當夫登眺山川流連林麓軟撲塵  
紅秀延野綠胸襟廓然舒其湮鬱非爾同遊誰狀心曲良朋  
久別故友重逢長橋躍馬延津會龍樹雲悵望杯酒過從非  
爾善感誰測予衷歲序推遷芳華鮮潔楊柳春風梅花殘雪  
點綴無多風神獨絕非爾清超誰酬令節葩經草木爾雅蟲  
魚知不厭小學及其餘技精刻棘見異拘墟非爾鑿空誰得

智珠人亦有言辭無過費窮緣詩工翻爲爾累我意不然實  
同臭味甫白齊名無位亦貴茲當冬盡臘鼓催年爲爾展敬  
香爇爐烟德則配聖心亦通仙如在其上靈風肅然

告文

愍忠祠告文

惟公等靈鍾茅蔣光炳日星感我生之北辰值上天之方醉  
金陵瓦解蘭成難遣哀思碧海石填精衛自忘力薄當王師  
之雨降正賊黨之震驚披彼腹心壯吾牙爪須婁伏甲欲聚  
齊戍以殲旃二禮巡城將掖國子而赴外無如夷庚旣塞舛  
午偏多聊從間道虬行藉達重圍鳶信方謂紡投紀鄣鼓譟  
攀升豈期襄入周興遭逢告密國中大索羣罹孕雉之災境  
外潛遁半數關雉之唱雖死生之偶異實忠義之同歸焉某

某等憑弔國殤追惟先德尋已醒之噩夢撥久冷之劫灰招魂篇重舉些辭表忠觀且援成例出亡死節皆求仁而得仁合食同堂亦亡禮者之禮爰諏吉日用肅明禋顧石城淮水之依然望風馬雲車之來格彷彿羅池祀柳並供蕉荔以明虔庶幾歲宿臨吳長眷梓桑而錫福

張靖達公祠安位告文

惟公潛岳鍾靈淮濱倡義蕩平巨寇空蠡屯蠓聚之羣節制兼圻臨虎踞龍蟠之地協李文忠之碩畫遵曾太傅之遺規景宗爲韋叡之同鄉共成偉績曹參繼蕭何而爲政不改舊章治功備載於史編恩澤遍沾於士庶某等夙蒙庇蔭仰企懷題崇祠布古柏之陰名垂萬世相芟舍留甘棠之愛詩誦召康牲醴告虔神其來享

祭文

公祭沈文肅公文

維年月日江甯紳士汪士鐸等謹以清酌庶羞之奠致祭於  
沈文肅公之靈曰禹貢揚域表海際淮自公蒞止威重外臺  
令行千里如霆如雷荏苒符斂迹里門夜開寢瀛似鏡波靖鯨  
鯢聲色不動望重華夷先陶後曾惟公與齊公猶戒逸吏牘  
勤披夙興夜寐剖析毫釐石城鍾阜都府所治事關民瘼張  
弛得宜青谿運漕秦淮分支濬深去壅清水濁泥橋梁重建  
虹亘東西渡船補漏集江之涓下田苦潦捍水築堤蛟生急  
捕蝗不爲災籌金積穀歉歲無饑勸分計畝社倉之規酒糧  
普減鼓腹農嬉編審停造快丁忘疲絲機免稅商競招徠講  
院增課士富文辭興利除弊知無不爲夷吾之略子產之慈

昊天不弔一旦騎箕長城忽毀眾失所依瞻顧垂涕何日忘之嗚呼哀哉尙饗

公祭左文襄公文

衡湘鍾毓竺生異人東清閩越西蕩崑崙出秉節旄入參樞密知無不言文有其質

天子南顧眷念疲黎特命聖相總制兼圻小民喁喁望公如歲自公來思恩威交濟會城之北井里爲墟水衡營建夏屋渠渠亦湖朱山南北水利鑿隘浚深旱潦有備士子上計與公車偕周其困乏行李往來織業所資機絲爲重稅免關津工無缺用公之恩澤徧及四民政成而去臥轍攀輪潞國精神平章重事幾相勦猷節制羣帥兵機政略惟公兼之安危所係名動華夷瞻仰昊天奈何不弔樞馬羣驚大星掩曜靈

輿漚止假道江湄出郭遠奠涕泗漣漣嗚呼哀哉尙饗

公祭曾忠襄公文

嗚呼天生我公再造江湄其忠藎之忱堅忍之力簡練之師  
凡所以復都會蕩瘡痍者久已爲國史所紀載文人所傳述  
父老穉子所謳思豐功盛烈伊誰不知惟自文正公騎箕而  
後南國遺黎望公來鎮幾歷二十年而始見公之旌麾溯從  
握節以迄今日又七年於茲矣其間島酋蠢動吳淞陷危公  
以全權折衝於海上而敵艦不敢內窺桂苻伺釁虺毒潛吹  
公因連職奉

詔以亟返而伏莽不致蔓滋人第見其守文正之法無所事  
事幾於蕭規而曹隨而不知望隆中外威著華夷不動聲色  
屢弭無形之患皆機神默運之所爲至其撫綏赤子惟恐傷

之苟有以擾民之說進者莫不斥逐其人而屏絕其辭蓋公  
之於我民始爲之攻毒螫繼爲之摩疴癢而終爲之調肉糜  
俾我民元氣漸復無非慈父母之用意能深入人之肝脾何  
圖一老天不憖遺黃童白叟異聲同悲輟春相告如喪其私  
固非徒爲

朝廷惜中甫之佐而實鄭人歌僑楚人懷葉有以感念遺愛  
於弗衰哀哉尙饗

祭張又堂軍門文

代

惟公嶠峯毓秀張宿降祚家傳弓冶學富縹緲武韜黃石儒  
業青箱乘時鱗躍應運鷹揚弱冠之年弢光弗炫橋梓自知  
久玉交羨留意英才默觀時變起舞雞鳴隱憂龍戰賊踰嶺  
嶠迭陷堅城江南瓦解皖北塵生商爲客將場練鄉兵從容

麾扇慷慨請纓淮旅初興實踵湘後策定不疑律嚴堪守夢  
上顏書邀原琨友謀借先容功成不朽楚軍東下文正主之  
蜺旌雲擁虎隊風馳嬰揮騎卒廣領偏師無堅不破有役皆  
隨傳相桓桓肅清吳會召我伙飛制人要害鞭擲斷流船行  
下瀨幕倏建牙江難限帶女牛之域控海引湖城修冰敏艦  
聚孫盧穴深匿鼠樹密藏烏前茅所指蒞蔓是圖雲合諸軍  
月間三捷韋叡鄉親袁絲貴俠采入推鋒飛行攀堞殲厥渠  
魁芟其枝葉東西掃盪左右贊襄蛇長演陣繼駕浮梁夙請  
形勢莫抗顏行一封露布千里康莊凱奏上騰勇名

天錫翠羽增輝丹屏紀績檠戟軍門戈矛壘壁長此留防猶  
如臨敵蘇臺繁富劫過成灰戎虞伏莽市冀通財雉堠補缺  
騶卒舉材兵民錯處耦俱無猜移鎮建康地大物博羣盡驅



鷓鴣巢母占鵲令甲宣威寵丁恤弱撫馭適宜亂乃不作長淮  
以北東捻未平元戎傳檄別道專征礮飛電火車走雷聲扼  
吭拊背功已垂成五夜捫心忽呼負負忠縱報

君情殷將母服事未能馳驅太久欲遂烏私且迴馬首治城  
一角迎奉板輿廿年隨侍八座起居常嬉萊綵不絕溫裾望  
雲何感愛日非疏景迫桑榆憂生几杖醫謝竭誠佛祈頓顙  
彤管貽輝總帷結想雞斯毀容馬鬣營壤既終養事素乏宦  
情寵尋抱朴冠挂通明遂初賦就招隱詩廢菊籬編織松閣  
經營結清淨緣敦任卹行族戚蒙恩孤寒託命家乘垂型方  
書起病齒髮未衰天人交慶麟振子盛燕翼孫承崔牀積笏  
錢宅圍繩鵲章璀璨鶴蓋飛騰薇垣競試桂籍頻登日正行  
天星胡墜地兜率歸眞勾陳失次雞夢兆災蛇年表異捐棄

賓朋感傷門議某久欽德望夙奉恩私躔依北斗域限南維  
瞻韓有願御李無期幸逢令子雅託深知末吏備員後塵學  
步肩荷奚辭眼空蒙顧法自守蕭譜如傳傳方仰卿雲俄驚  
孤露長途在望噩耗偏來電馳萬里霧掩三台沈車寂寞馮  
樹凋摧麟圖定畫鶴弔尤哀嗚呼海水滔滔江風獵獵執紼  
無從奠芻亦攝敢述勳猷敬書簡牒丹悃畢申明靈儻接哀  
哉尙饗

祭朱子期文

繫予生之介特塊獨立而無徒惟與君締交三十餘載而敬  
憚不改其初猶憶識君於朱門歲在癸丑正流離板蕩之餘  
時予年甫將冠懵然無識君乃以予爲可語告以駢儷聲律  
之學俾不終困於迷途由是訂爲知己以古道相勸又復託

誼於葭莩雖或中間數經離合而常如蛩蛩之與駟虛南則  
元武靈谷北則慈仁善果游同舟而出同車泊庚辰禮闈報  
罷以後君留天津而入幕予遂汎南下之舳艫當夫道効話  
別刺刺絮語孰知其爲永訣而踟躕以君之神明強固膚革  
充盈方以爲耄耋可卜定入香山洛社之圖胡中壽之未屆  
遽歸冥漠致令數平生之朋侶落落如晨星之疏矧予頃以  
養親里門不望長安而西笑君尙聞之而寓書謂數年之睽  
隔藉茲一聚慎勿高尙於鄉閭予讀此書心怦怦其欲動豈  
料復面未達已聞噩耗而驚呼望黑水之重洋閒關南北程  
途備極其崎嶇賴介弟星奔以渡海甫經匝月卽歸千里之  
靈輿悵城關之未生入銘旌搖搖其無定乃暫寄於莫愁之  
湖惟茲華嚴古刹依水爲屋實當年人日挑菜之區一觴一

詠曾幾何日尋墜歡其已杳如阿戎之過黃壚玩新荷與細柳雖依然其如舊終不能易悲而爲愉嗚呼天道昧昧好惡何殊攘奪爭陵者无不利孝友貞義者或多虞依阿佻巧者顯於世清廉剛正者喪其軀其顛倒也若此固斯民之不幸而非徒傷吾道之孤然予獨於此傷悼不已者蓋以行誼之失無所嚴畏文字之式無可楷模卽至登臨山水探幽絕險亦無伴侶之與俱君如有知尙翩然其來止鑒此一東之生芻哀哉尙饗

祭二妹文

嗚呼同產五人忽弱一个望祭天涯心酸淚墮妹素靈警死必有知魂兮其來聽我奠詞吾妹今年齡甫廿七于歸周氏五百餘日辭赴潁陽一歲未畢溘然遽逝痛傷何極憶汝平

生歷歷堪述嗚呼吾妹孝德克全在室事親族戚稱賢曩侍  
大母尤蒙愛憐大母有疾牀蓐纏綿撫摩搔抑皆汝當先大  
母遺命賜汝釵鈿家貧用罄中心悄悄阿耶前日欲寄償焉  
信使未去噩耗先傳孝不蒙福思之泣然嗚呼吾妹性不忤  
人靈心慧舌工於語言同輩見汝無不歡欣我與汝嫗記曾  
反唇汝來相勸片言解紛善戲以謔衍之爲文言猶在耳今  
何忍聞嗚呼吾妹聰明莫比吟咏詩詞中心所喜我時披展  
示以法軌點竄無多居然盡美草號繡餘曾無鄙俚結襍以  
後音忽變徵我心私憂勸汝戒止豈料今日果至於此嗚呼  
吾妹婉婉夙成旣顧大義又惜聲名規夫以正苦志經營羸  
得家人柔順相稱柔制已性順體人情抑情忍性病所由生  
一發莫禦大命遂傾嗚呼哀哉何天道之無知兮忍韶年而

見奪其明慧之太過兮自取罰於冥漠將轉劫於風輪兮幸  
塵緣之解脫抑侍疾之無人兮以倉卒而成錯嗟無術以返  
魂兮杳不知其苦樂憶去歲之辭我兮展一拜於中堂我心  
慘其不悅兮若輪轉平迴腸念平日之睽離兮曾不動夫感  
傷何茲別之耿耿兮獨展轉而難忘及今日而始悟兮永訣  
實異於尋常檢前月之來函兮索達生之古編豈預知有此  
厄兮欲防備於事前恨魚鴈之無便兮致汝命之遽相望迢  
迢之道路兮徒痛絕以呼天嗚呼哀哉潁山蟲蠹水湯湯些  
蕭然旅櫬滯異鄉些積愛情恍游無方些父母命予薦一觴  
些室設總帷明燭光些魚羹清潔嘉蔬香些老穉痛哭聲沸  
房些嗚呼哀哉吾妹之靈其歸然而來翔些尙饗

祭三妹文

烏庠哀哉自二妹之遺產厄兮吾父母悽惻以心傷歷十餘  
年而猶未已兮今又重之以汝之喪羌惟汝之秉賦兮質和  
順而性聰強何彼蒼之不弔兮竟中道以云亡烏庠哀哉近  
世女子之工讒兮搖唇鼓舌眩惑耶孃一家骨肉視若參商  
汝則和以居室兮無阿叱詬諄之聲處嫂娣如姊妹兮待諸  
姪如所生烏庠哀哉近世女子之犯分兮不安卑賤觸忤尊  
嫜箕帶細故反脣相將汝則順以從姑兮小心奉廚下之羹  
湯每歸甯以閒話兮必頌堂上之賢明烏庠哀哉近世女子  
之奢侈兮膏髮澤首金玉珠璫拮据供給弗恤其良汝則聰  
以佐夫兮必慮遠而思長徹環瑱以相助兮不耀衣飾之輝  
光烏庠哀哉近世女子之耽逸兮早眠晏起顛倒衣裳樛繡  
博戲日嬉以荒汝則強以任事兮勤縫紉而潔酒漿啟箱篋

而檢視兮猶有未成之兒襁烏虆哀哉人反常則不壽兮種  
種犯世之不祥天亦惡直而醜正兮毋乃爲自貽之殃然此  
特激烈之說兮終不可以爲典常吾且爲轉語以慰汝兮汝  
亦可無憾於九京汝頃暫栖於別塵兮生子而月猶未盈非  
汝姑與叔之明決兮安得歸而殯於堂念汝平日之柔謹兮  
自鄰里以下逮僕媪莫不同聲而感愴烏虆哀哉汝得此其  
亦足兮又奚論乎彭殤況汝之夫兮宅心忠厚之鄉悃昨非  
而今是兮夫何事業之難成汝之子兮露頭角之崢嶸先諸  
弟以著鞭兮讀書過目而不忘汝之女兮曉事理而通方雖  
齟齬而痛若成人兮每血淚之承睚較二妹實爲多福兮後  
來定卜其蕃昌烏虆哀哉凡吾之爲此言兮非漫爲太上之  
忘情蓋上以塞吾父母之悲懷兮而卽以告汝筵几之旁烏



序哀哉尙饗

祭龔蔗軒文

烏序惟我與君居同里閭少小赴塾頻遇諸塗壯入膠庠無  
試不俱甲乙平列和女倡予我先食餼君屢向隅君戲自嘲  
命乏天廚後我十載始分廩儲士習佻巧飾智矜愚君獨守  
分寸步繩趨我愛其誠人笑其迂兩家子弟幸能讀書君兒  
我壻潤匹璚璵我姪君壻雀屏中弧婚媾旣申交情愈孚君  
著貢籍我罷公車匡居多暇前喁後于出入必偕茶社酒壚  
春秋佳日訪古名區腰腳並健杖不須扶永慶破寺莫愁明  
湖履跡宛在苔蘚模糊今年之夏光緒戊戌時事艱虞法勞於絲  
米貴如珠相逢扼腕祇益歔歔運會幸轉埽盡榛蕪香山洛  
社老庶堪娛何意君病徵醫召巫屢經探問神明湛如數日

不見遯歸幽都誰爲先兆大風折榆木壞人葵古語非誣我  
重過此想象眉須遺挂在壁奠以生芻酌酒敘舊君其知無  
烏序哀哉尙饗